



بعض طار صوقاقلردن طولانا طولانا
 نهایت بیاض بر جامعنک اوڭنه
 وارردق. انسان ییغینلری آراسندن
 یول بولوب قاپییه یاناشمق نه گوج
 ایشدی... نهایت زور زار گیرر، بم
 بیاض حصیرلی یوللردن یوروویوب
 یشیل آطلاسدن بر مبارک بوخچهیه

یوز گوز سورردک. طیشاریده خلق قایناشیردی فقط بو حُجره ده و اوڭا مُنتهی
 دهلیزلره اُخروی بر سکون حکم سورردی. چیقارکن بر مدّت، یینه گری گری
 یوروردک. ایشته اوزمان چوجوقلغمک اڭ هیجانلی بر دمی باشلردی: اولیده اوزون
 اوزون یول شیشهله طولدیرولمش رنگارنک بویالی صولر صاتارلردی. بونلر نه
 ایدی؟ معناسی، خوشلغی نره سنده ایدی؟ اونی آلان بیلیمه یورم، تخمین ایدمه یورم
 غایت ابتدائی بر نوع اویونجاق ویا سوسدی فقط دُورک بتون چوجوقلری، اوڭنده
 دیکیلیر، قالیر؛ آلماینجه گیتمزدی. بڭا،

- هایدی، اوچ دانه سیچ باقالم، دیرلردی.

بر مور، بر طورونجی، بر ده صاری سیچردم؛ یول بڭا اوزون گورونوردی، آه بر
 اوه واروب اوینامغه باشلاسه... فقط بو شیشهلرک اوینامغه هیچ بر مزیتی یوقدی.
 همن صولرینی موصلغه بوشالتیردم؛ گرییه بنکلی، طالغلی و آغیز طرفی قیریق ثقیل،
 بیچیمسز جاملر قالیردی و اُلمی، بر یریمی کسمه سین دییه اونلری ده اوصوله حق
 آلوب اتارلردی. فقط اوبش اون دقیقهلق هیجان نه گوزل شیدی و یڭی بر رمضان
 و یڭی بر خرقة شریف زیارتنی بڭا نه صبرسزلقله بکلتیردی!

کیم بیلیر، شیمدی، اوراسی ده نه بوم بوشدر. بلکه او رنگلی شیشهلری یاپان و
 آلان ده قالمامشدر. آه، نه دییهیم؟ آغلا چشمم، آغلا، طورما!

رفیق خالد قارای، غوغوقلی ساعت